

#1 STORY BY LEYANGOITIG

Iwe minna rongorongoi me reer re mwoiuwe, pwe erhai re Satawal ittan Agrupw. Iy minmwu esaiti Saipon. Iwe anoa mwagiut me Satawal, a itiwou Faiew. Iwe anoa nono Faiew emwagiut nge a itiwou Saipon. Iwe anoa itinong waa na waan weni fanuw, enoa itinong nge esoar aremas, pwe peon. Iwe nge a sefaan nong. Pwe aitinong pwoiupwog an foat. Iwe a itiwou anoa itinong woai Saipon. Iwe anoa girigir noa an foat aremas me e. Iwe esoar pwaniupwaniun waa na waan. Iwe anoa feingi feingi rheon arepwan anoa pwaniuw ngani. Iwe ina faan minmwu ra aita ngani iginaan pwe Arepwan reen. Pwe ina igina re feingi waniuwaniun pwe pwanupwaniun waa na waar. Iwe nge Saipon ina saapw pwan Saipan, pwe Saipon. Pwe iga re saii nge peon.

Renonoa rhag nge anoa pasto ew feofas nge yor aremas woan. Iwe nge ra aineor igine reito me e. Iwe nge reiura, reito me Guam. Nge irr remangii rhag pwe sapw irr aremesan Guam pwe aremesan yeor en, nge mani repasenoa iwe raito esoapw Saipon, rhoan feofas we. Oatowe re Siaman renoa itto woan Saipon iwe ra itto rhufengan me rhoan feofas we, iwe repwigi rhag ra niynea erhai pateren Spaion. Rhoan soapw we soapwor re Satawal rese tapweer ren niin patere we. Ir re Siaman, rafeori pwe repwene nemani noa Saipon. Iwe iy wonowe Agrupw a pwigi rhag a fangnoa iy goauroura we me erhai rhoapwut pwe meon fanuw we fanuwan, Saipon pwe rete itto nemaninoa. Igiwe ra finen repwene nemani noa. Ina minne re Siaman rese namnam noa woai Saipon reen. Pwe agin minikewe meon Saipon me ren Agrupw.

Iwe aitinong iy Agrupw pwe a itinong sangesang woai Satawal, iwe rhag nge eita rhag fanuwai soapwota en esefantiw nge anoa foarh fanuwai soapwotiw mwu. Iwe nge ie anoa foarh Saipon. Iwe ie anoa itiwou nono iy Agrupw woai Saipon ie anoa sipegin maa noa me e, iwe repwegi rhag iwe ranoa nipwani noa woan Galigal. Igai rongorong pwe Guam nge saapw Guam, pwe Giuyamw. Iwe ina rhag nepan minmwu rongorongoi me reer re mwoiuwe pwe repwan gan fifiyoangei iy minmwu fiyoangon Saipon.

#2 STORY BY RELUGMWAI

Ei ipwen apesa pwan giufetin e ipwan gan rongorong fetan me reer tugufai kewe iweriir, ipwan weri arr maa noa. Minna rongorongoi me reer. Regan anganiai pwe waa na waan Agrupw, esou me Satawal, itiwou Faiew, itiwou Giuyamw. Iwe wa na waan Giurhiun esou me Elato itiwou Faiew itiwou foarh Saipon. Nge Agrupw iwe ano waan Giuyamw ii. Iwe pwai sou wonowe Agrupw me Giuyamw, itta Luta, enoa itta Saipeon

nge waa we waan Giurhiun iwe e yoapou serag fetan niugiun worhan Saipeon pwe emesag pwe epwe itinong weni fanuw. Itiwou rhag iwe waan Agrupw ii itinong foarh ee, tonong ne noamw itinong weni fanuw. Saapwan weni fenuw e noa foarh newan pwe mesan fanuw rhag. Itinong rhag nge ra saregi arepwaniun mesan fanuw we Saipeon pwe ra tonong mwoan faan nge re pwoiupwog wou pwan pwaniupwaniun waa we waar. Iwe ra nono ee, fan arepwan we. Nono e egan fetanni pwong, igine epwene gan pwongnoa, iwe nge raitta aiunamw fetan ngare yor aremas ne repwe weri, me matta repwe weriwer fetan. Iwe esoar. Iwe rhag nge retonong me egius. Rapwan arapnong egius newan. Noanoa ee, aiwe rhag feoriur tanitoi raan e tiwnoa me epeig Saipon nge esoar aremas. Iwe nge enoa sefanwou wonowe Agrupw nge eitiwou angani Giurhiun pwe one itinong pwe ie esoar aremas. Enoa itinong waa we waan wonowe Giurhiun nge ina nge Agrupw a sefaan me woan Saipeon, pwannin Saipeon pwe esoar aremas. Iwe pwan gan iei rhag minne rongorongoi me reer tugufai kewe ra memmanoa.

#3 SONG BY CARMEN NAGIEBURH ("Uwapwou...")

(This song was already completed by Ineniugman on Tape 1 Side A, number 2).

#4 STORY BY CARMEN NAGIEBURH

Iwe ipwan apesa egiufet e rongorongoi. Rongorongoi ina, Giurhiun egomw mwan Agrupw, nge ese tonong woai Saipon pwe emesag. Iwe Agrupw ina egamwirwou, aitinong weni fanuw anoa sagi arepwenan mesan fanuw, ramwoan faan, fengan me waan. Iwe egan pwong noa nge ragan itiwou anamw fetan are yor aremas. Iwe aiwe ar pwigipwigi e eraan noa nge re mwoanong fan arepwan we re mwoan faan. Anoanoa e mani renoa giuneinoa pwe esoar aremas iwe nge iwe retowou me faan arepwan we nenier. Iwe ra itiwou no woai Saipon. Iwe nge iwe waan Giurhiun iwe esefan. Ese tonong weni fanuw pwe emesag, iwe a sefannong. Iwe pwan iei rhag gufetin e rongorongoi.

#5 STORY BY PAULA LAIPOLUR

Iwe ngang ie rongorongoi me igiwe ren kepesai Saipon. Agrupw eitiwou a gomw wou Faiew, a itiwou Guam a saiti Saipon. Eitiwou nge esarno aremas woan Saipon. Pwe a peon Saipon rhag. Iwe ie a sefan nong pwe a itinong pwoiupwog chuwaiun Saipon ie a pwigiwou amwoi saan, waniman rhoapwut, efai goauroura. Pwe a pwigirwou nge anoa

itiwou fangnganir manekena reno woan Saipon. Iwe nge iwe iy a foatoginoa Saipon pwe fanuwan. Enoa sefan nge a itinong pwoiupwog aremas pwe a pwoiupwog wou woai Saipon, pwe ranoa itiwou nonoa woai Saipon. Iwe ina minne wewen girh igina sia iura pwe Saipan nge igiwe nge irr reiura pwe Saipon pwe iga re saiti nge peon fanuw rhag. Iwe ami imwu awpwan gan iura pwe Guam. Iwe nge remam nge aiura pwe Giuyamw. Iwe nge igomwu awiura pwe Rota nge amam aiura pwe Luta. Nge igomwu awiura pwe Tinian, nge amam aiura pwe Chinyoan.

Iwe aia no e, a tefan rag me rag, ragin an Agrupw noa maa noa woai Saipon. Aia nono a rag me rag ee, iwe Reppuangnap, Reppuanglug, Ikinap, Rhapemwai, Akin iwe ranoa pwe rapwan agina woui iy metaw mwu metewai Saipon. Iwe nge amam rhoapwut iwe aia igin saang, sangin amam faiyor pwe aipwe iura pwe repwene noa nge resoapw rhuwen sefanitono. Aia gan magtiw sang woar nge rang, rengar noa. E iwe ie ranoa. Noa noa ranoa itiwou nono e rapwai noa sefan. Pwe rapwai noa sefannong. Iwe iga repwene pwai noa itto pwan ew amam igin keer agini arr pwai noa sefanito. Aia magwou woan iy waa we waar Mai Sugun aianoa itiwou teo fetan woan nge aurhap nge ripiy fetanei nge pwoiupwog saren tutun peras kewe pwigier nong. Pwe aia yoata ngani saat pwe aisa giuneino minne aipwe feori nge sang yoryor fetan. Ee ie rapwan itinong no. Pwe re agina pwe aise niugniug pwe repwe noa nge repwe menaw pwe iga aise giunei mwirmwirin an Agrupw saiti. Pwe kepesan rhag. E iwe ie igina aia pwai niugniug pwe iga a nnet nganigemam pwe iga irr rapwai saiti. Iwe ie rapwai noa itiwou, a sow arr sesaiti pwe reitinong nono me efoarh eitiwou. Enoa itiwou nono nge enoa sefan.

Fan iy sai we an Reppuang iwe eitiwou. Eitiwou pwe rhoan pwanpwaniun paian iy Agrupw. Saipweirik minwe e mwiriy Agrupw ie pwan mwanni Anatiw rhag. Iwe iy minne epwai sessaiti Saipon ie Reppuang a mwiriy.

#6 SONG BY LAIPOLUR

(This song was already completed by Ineniugman on Tape 1, number 4.)

(Simin yeoriun Engiris)

#7 STORY BY REPPUANGNAP

(This is a copy of the last half of the story by the same speaker on Tape 18, Side A, number 1, beginning with the third paragraph on page 4 of the Tape 18 transcription.)

(Story about Ikiwot, Mau, Reppuanglug)

END TAPE 19 SIDE A

TAPE 19 SIDE B

The entire contents of Tape 19 Side B are exactly the same as side B on Tape 18.

END TAPE 19 SIDE B